



UTRECHT - Wel, mi hendenan. Prome cu tur cos un hende please bisa mi con mi filter e palabranan "Donald Trump" di mi newsfeed riba tur media social? Pa por lo menos 7 luna te ora mi recupera mentalmente di tur su malicia? Mi no por mas. Mi ta exhausto, fada, hostina, etc.

Awo, mi tin un topico un poco serio cu mi kier papia di dje. Un cu mi ta pensa masha poco hende ta tuma na serio pasobra hende ta subestima e poder di tin bon amistadnan den nan bida, mescos nan ta subestima e poder cu un

amistad tin pa kibra bo curason. Un cos di Hulanda, den mi perspectiva ta cu bida riba su mes, ora bo ta un estudiante ta uno hopi solitario. Si bo no cera bo bon grupo di amigo of busca actividadnan pa haci despues di scol y ora no tin scol probablemente bo ta caba tira riba cama pa oranan largo ta wak pelicula of pensa riba bo hendenan na Aruba.

Ami di berdad a core cu suerte, mi a topa yen hende leuk di diferente cultura cu kendenan mi a cera amistad. Den mi circulo di amigo, pa esunnan cu ta sigui mi via Facebook bo por wak cu tin

Armenia, Italia, Vietnam, Brazil etc. Ta hopi bomboshi ora nos ta hunto yiu. Pero, manera bida ta dicta no ta tur cos ta perfecto y tin ora nos tur ta bou presion sea cu scol, heimwee, problemanan personal y tin ora nos ta papia malo cu otro, rabia, bringa, maar ja that's how it goes.

Tambe tin personalidad cu ta mas dominante cu otro y den e grupo tin e lider, e siguido, e payaso, esun emocional, esun cu semper ta fiesta, etc. Den un manera, amistadnan na Hulanda tin un otro nificacion cu amistadnan na Aruba, pasobra na Aruba con cu bay bin mi tin famia tambe.

Na Hulanda, bo amigonan ta bo tur cos si bo no tin familiar. Pero ora un amistad cuminsa bira toxico, ora bo amiga of amigo stop di ta e motibo pakico bo ta hari asina hopi y cuminsa bira un fuente di inseguridad kico bo ta haci? Cerca ken bo ta bay?

Pakico e dolor di curason di wordo lastima pa un amigo, no ta wordo tuma mesun serio cu ora bo kibra cu un pareha of ora bo bringa cu un familiar? Nos tur sa di e amigonan ey kende nos semper ta duna

un 100% di nos y nan ta duna nos un 32% di nan, pero toch nos ta keda. Dicon nos ta haci esey cu nos mes?

Di experiencia propio mi por bisa cu mi a keda den amistadnan toxico pa hopi largo, cu mi tabata haci excuus pa e manera manipulativo y negativo cu cual hendenan cu algun dia mi a yama amigonan a trata mi. Cu mi a duna y duna y duna te ora mi mes a keda sin nada y ora nan a traiciona mi, otro hende tabata bisa mi "no haci di mas, stop di yora pa hende kens". Ken sa, podise ami tambe tabata e amiga toxico un biaha.

Recientemente mi a perde un amistad aki na Hulanda, claro cu mi tabata tin mas amistad pero e amiga aki mi tabata stima mas cu tur otro. Ban yam'e Elsa.

Elsa tabata special pasobra Elsa tabata di Corsou y e tabata tin mesun contexto cultural cu mi. Cu Elsa 2or di madrugada tabata bati den bar y ainda nos tabata bebe mojito y hari e tur e cosnan cu tabata pasa riba nos islanan, over di con diferente hende Europeo ta. Elsa tabata papia Papiamentu y pa mi Elsa a bira un

cas leu di cas.

Un dia Elsa a stop di papia cu mi. Asina, sin motibo, sin rason el a tuma mi manera un tres dia pa realisa cu no ta cu e no kier papia, (pasobra Elsa tabata poco moody y e tabata tin su dianan) ta djis cu e ta kies pa ignora mi. Elsa ta den mi klas y tur dia mi tin wak e y pretende cu e echo cu el a dicidi di tira mi un banda no ta haci mi dolor.

E palabra "amistad" tin un nificacion grandi, e ta un palabra cu por salba bo pero por destrui bo tambe. Ami sa cu si Elsa algun dia bin bek y dicidi pidi sorry, mi no lo tum'e bek. Pasobra mi ta pensa, pakico duna un hende cu a trata mi manera cu mi no ta bal nada un otro oportunidad? Pa nan bolbe haci'e?

Kico abo ta pensa? Bo lo tuma bek un amistad cu a kibra bo curason pasobra boso tin mucho historia of bo lo laga historia keda historia y spera pa mi miho amistadnan den futuro?

Un amistad mescos cu tur otro relacion ta un compromiso y di berdad, si bo no kier compromete ta miho bo bula afo.